



Sensibilité politique  
Boîte postale 83  
L-7201 Bereldange

Fernand ETGEN  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 20/12/2019

**Här President,**

**Sou wéi den Artikel 83 vun eisem Chambersreglement et virgesäit, bieden ech lech, dës parlamentaresch Fro un de Minister fir Mobilitéit weiderzeleeden.**

Lokführer ze sinn, ass ee schankenhaarde Beruff: nieft der héijer Responsabilitéit eng 7000-PS-staark Maschinne korrekt ze manövréieren, schaffen d'Lokführer an engem onrégelméissegem Zäitplang Dag a Nuecht – oft och d'Feierdeeg – a sinn doriwwer eraus och fir d'Sécherheet vun dausende Passagéier responsabel, déi all Dag matfuere.

Wéi aus verschiddene Froe vun de Gewerkschafte souwéi de respektiven Äntwerte vun der CFL-Direktioun erauszulesen ass, besteet aktuell ee Mangel u Lokführer bei der CFL an d'Ofgäng vu Personal gi net duerch genuch Neiastellung gedeckt. D'Aarbechtsbedéngunge hunn sech aus deem Grond aktuell, nieft den aldeeglechen Ufuerderunge vum Beruff vum Lokführer, duerch ee Mangel u Pausen a Rouzäite verschlechtert.

An deem Zesummenhang wéilt ech dem Minister dës Froe stellen:

1. Wéi huet sech de Personalbestand u Lokführer an de leschte 5 Joer, opgeschlësselt pro Joer, beim Grupp CFL entwéckelt?
2. Wéi vill Lokführer sinn an de leschte 5 Joer, opgeschlësselt pro Joer, beim Grupp CFL agestellt ginn?
3. Wéi vill Lokführer hunn an de leschte 5 Joer, opgeschlësselt pro Joer, hier Platz beim Grupp CFL opginn?
  - Ass de Minister der Meenung, dass déi aktuell haart Aarbechtsbedéngungen ee Grond duerstellen?
  - Wat kann de Grupp CFL besser maachen, fir den Employee Turnover bei de Lokführer ze reduzéieren?
4. Wéi vill Iwwerstonnen hunn d'Lokführer an de leschte 5 Joer, opgeschlësselt pro Joer, gemaach?
  - Wéi vill vun dësen Iwwerstonnen goufe geleeest a recuperéiert?
  - Wéi vill Iwwerstonnen goufen ausbezuelt?
5. Wéi vill mol gouf an de leschte 5 Joer, opgeschlësselt pro Joer, d'Paus tëschent zwou Aarbechtswochen vun 38 Stonnen (Artikel 52 Punkt 13.3 vum CFL Statut) beim Grupp CFL net respektéiert?
6. Wéi vill Roudeeg si bei de Lokführer an de leschte 5 Joer, opgeschlësselt pro Joer, gestrach ginn? Ass de Minister der Meenung, dass d'Sträiche vu Roudeeg de Lokführer d'Méiglechkeet gëtt, sech anstänneg auszerouen?
7. Schätzt de Minister, dass aktuell een akute Mangel u Lokführer bei der CFL



[www.piraten.lu](http://www.piraten.lu)



Sensibilité politique  
Boîte postale 83  
L-7201 Bereldange

besteet? Falls jo, wat sinn d'Grënn dofir? Falls nee, wéi erkläert hien sech d'Kritik vun de Gewerkschaften?

8. Wéi vill Zich sinn an de leschte 5 Joer, opgeschlësselt pro Joer, bedéngt duerch Personalmangel ausgefall?
9. Plangt d'CFL an de nächste Joren d'Aféierung vun autonom fuerenden Zich, also Zich, déi ouni Lokführer kënnen fueren? Falls jo, wéi wäert CFL d'Lokführer op deem Iwwergang ënnerstëtzen a wéi eng Karrieresméiglechkeete ginn hinnen intern gebueden?

Mat déiwem Respekt,

GOERGEN Marc  
Député

